



## 另外一種博物館

毋知你敢捌去過博物館？無論是故宮博物院、臺灣美術館、臺中自然科學博物館……遮的博物館相信你加減攏捌去過。每一間博物館攏有家己的特色，而且咱臺灣博物館的水準已經有法度和世界相比並，所以每一冬攏有誠濟國內外的遊客入去參觀。

雖然臺灣的博物館遐爾仔濟，猶毋過，阮上蓋愛惹的是另外一種「博物館」。這間特殊的「博物館」無壁堵嘛無厝瓦，去遐穿插毋免傷擎紮，想欲穿懸踏仔抑是淺拖仔攏在你歡喜，排列的物件只要你恰意，會當提起來摸嘛會當紮轉去。若是講著伊的名，彼真正是「頂港有名聲，下港有出名」，也就是高雄的「賊仔市」。

「賊仔市」這個名，聽起來內底若親像是咧做啥物違法的生理，其實來遮做買賣的攏是古意人，只不過賣的中古貨價數攏誠俗，予人叫是毋免本錢的賊仔貨全款，所以才會共號做「賊仔市」。高雄的賊仔市會使講誠有歷史，早前拆船業猶誠發達的時，一隻船拆了後，船艙內底有真濟雜細，古物商就會去買落來整理，最後就會提來遮排擔仔。

佇進口貨猶閣有限制的年代，若欲買過鹹水的俗物就愛來遮揣，因為百貨公司賣的進口貨傷貴，一般人能力有限，實在買伊袂起。猶毋過，若來賊仔市只要目色好，定定拈會著大碗閣滿墘的好物。無論是煮食的鼎鍋仔、船員咧用的家私、靴管、召鏡，甚至是曲盤、薰穀仔……五花八色，應有盡有。阮嘛捌佇賊仔市買著一枝用番麥心做的薰吹，外型誠有藝術感，每一個看過的人攏呵佬甲。

這十幾年來拆船仔貨是愈來愈少，顛倒有誠濟人共厝裡無需要的物件提來排擔仔，所以賊仔市的規模是愈來愈大，上奢颯的時陣有四百外擔，排甲對九如路遐去。佇你的眼內，無定著彼只不過是歹銅舊錫爾爾，但是對阮來講，遮就若像城市的博物館，將咱以早生活過的痕跡，閣一擺重新展現佇目睷前。

可惜佇舊年底，因為租金的問題，高雄十全路的賊仔市已經煞鼓，予人感覺不止仔拍損。

作者：洪淑昭

### ☆詞彙學習☆

【比並】pí-phīng：比較。

【穿插】tshīng-tshah：穿著、打扮。

【擎紮】pih-tsah：衣冠楚楚。形容服飾衣著整齊鮮麗。

【賊仔市】tshàt-á-tshī：指舊貨市場或專門交易贓物的市場。

【雜細】tsáp-sè：雜貨。各種日用零星貨物。

【買】bāu：又唸作 bàuh。承包、包攬。

【目色】bák-sik：眼色、眼神。

【大碗閣滿墘】Tuā uánn koh buán kīnn：比喻物美價廉。

【召鏡】tiàu-kiànn：望遠鏡。

【曲盤】khik-puánn：唱片。

【薰穀仔】hun-khok-á：菸灰缸。

【煞鼓】suah-kóo：引申事情或活動結束。